

Augsburg, 5. Februar 1576

An Theodor Zwinger

UB Basel, Fr. Gr. I 11, fol. 350r (nicht eigenhändig bis auf die Unterschrift).

S. Superiore anno D. Ioannem Scheurlinum excellentiae tuae per literas commendaui (etsi ei qui ingenio et doctrina excellit, aliena commendatione non opus est) vnaque misi literas Friburgum mittendas. Quas an acceperis, valde dubito: cum per multas ambages ad vos perferendae fuerint. Ac dolere me Cydonij et Plethonis optimos libellos iacere, sane dissimulare non possum: quod coniecturam inde capio (etsi res ipsa incurrit in oculos) et vitae ciuilis moderationem, et aeternae meditationem, paucissimis esse curae.

D. Adolphus Occo excellentiae tuae salutem optat, quamquam ignotus: gratiamque habet de nauata sibi apud vestrates Typographos opera: et rogat, vt literas adiunctas ad Pernam mittere ne graueris. Id et illi et mihi, vt caetera plurima tua in me officia, pergratum erit: quae vtinam pari studio et maiore commodo tuo, compensare possimus. Vale Augustae Vindelicorum Nonis Februarij anno 1576.

Hiero[nymus] Wolfius
Tuus.